



DEO OPTIMO MAX.
UNI ET TRINO,

VIRGINI DEI-PARÆ, ET S. LUCÆ
Orthodoxorum Medicorum Patrono.

QUÆSTIO MEDICO-CHIRURGICA,

QUOD LIBETARIIS DISPUTATIONIBUS
manè discutienda, in Scholis Medicorum, die Martis decimo
mensis Martii, anno Domini M. DCC. L.

PRÆSIDE,

M. HYACINTHO THEODORO BARON;
Doctore Medico, Castrorum REGIS & Exercituum,
ultimo saviente Bello, in Germaniâ & in Italiâ Proto-
medico, nec non Medico magni Nosocomii Parisiensis.

An, etiam in Chirurgicis, Naturæ Medicatricis efficaciam agnoscat
Medicina Militaris?

I.



AM ante viginti duo sæcula, vel inter ipsa Medi-
cinæ rationalis incunabula, Naturas Morborum Me-
dicatrices agnovit & celebravit HIPPOCRATES. At evi-
dentiorum si cupias Naturæ Medicatricis operatio-
num demonstrationem, quod olim MACHAON &
PODALIRIUS aggressi sunt, idem aggredi ne reformides. Ducibus

A

& Militibus, ad Bella proficiscentibus, te commilitonem adsciscas; inter Exercituum tumultus te Medicum conseras; commilitonibus opem non mediocrem allaturus. Ibi Naturam, miracula patrantem, observabis. Ibi Morborum omnium iliadem animadvertis. Ibi Vulnera innumera, & omne genus eorum quæ *Chirurgica* dicuntur, frequentissimè versabuntur ob oculos. Ibi Chirurgiæ decerni triumphos spectabis; sed isti triumphi Naturæ non obscurant gloriam. Tertia namque Medicinæ pars, quæ manu curat, etsi plura satagere videtur, etsi ejus opera magis subjiciuntur oculis; nunquàm tamen propositum attingit scopum, nisi cum Naturæ vestigiis insistit docilis, aut ipsam agentem finit & admiratur. Atque si attentâ mente Medicus omnia consideraverit, Naturæ efficaciam nullibi magis resplendere fatebitur.

MARTIS & BELLONÆ sectatores, vegetas Ætatis adultæ ac Juventutis vires, robustis in corporibus ostentant, duro labore confirmata obtinent Membra, crassiore & parciore Pane Castrensi victitant; Aquâ, nec semper optimâ qualitatis, sitim sedant; Carne paucissimâ, tenuissimò Jusculo, & Oryzæ quandoque unciâ, famem labore excitatam compescunt. Iidem veste tenuiori, sæpiùs marcidâ cooperti, à tempestatum injuriis vix proteguntur: præsertim Autumno & Hyeme, quibus inclementissimis, Expeditionum militarium temporâ prorogandi quasi mos invaluit, ab ultimo decennio. Jam verò, si dormiendi aut quiescendi urgeat necessitas? Terra lectus est, exiguo Stramine, ac ne vix quidem Stramine consperso: ibi, unius Tentorii spatio strictiori, sex septemve contubernales simul degunt, & ab ardentissimo Sole, à Pluviis quandoque continuis, à Ventis vehementioribus & frigidissimis, à Nive, Grandine, cæterisque Cœli inclementiis, non aliter, quàm interpositâ Tentorii telâ, defenduntur. Interim Excubias fideliter agere, sub Dio; Aquam, Ligna, Panem, cæteraque Vitæ Necessaria, sæpissimè longius quæritare, quâcumque faviente tempestate.

Tot & tanta qui sustinent, qualiter se habere existimes? Hos videbis non modò vivere, sed valere; non tantum valere, sed latari, sed choreas agere, sed jocosis confabulationibus tædia fallere; atque, cum truci vultu minacibusque oculis, in robusto Corpore intrepidum Animum gerere observabis. Hos eosdem, ad Imperatoris jussum vel nutum, difficillima quæque Opera aggredi ac perficere; durissimos Labores suscipere, Castra mutare ac circumvallare, Fluminum alveos tranare, aut eorum cursus detorquere; Pontes construere; Terras effodere ac subvertere; Arces munitissimas obsidere; Muros adi-

ficare aut destruere ; superbissimas Turres extollere aut diruere ; in Aciem strenuè prorumpere ; Hostes ferociter aggredi , confodere , fugare ; aut eorumdem impetus intrepidè sustinere animadvertes Atque demùm , his omnibus exantlatis laboribus , hâc duriori Militiâ , plusquàm viginti annorum spatio defunctos , quàm plurimos agnosces , in eo Regali , Hospitio dicam ne an Palatio ? quod , inter alia innumera , LUDOVICI XIV. nomen Immortalitati consecravit , quodque auxit & perficit hodie dum Paterna REGIS in Duces æquè ac Milites Munificentia ; ibi inquam , quàm plurimos agnosces , vegetam agitare Senectutem , nec turpem , nec cytharâ carentem.

Hæc certè omnia , quid valeant Naturæ vires in sanis Militum corporibus , splendidè arguunt.

I I.

VERUM utcumque valeant Naturæ vires , ipsas plurimùm labefaciunt nimium diù protracti Labores aut Vigiliæ ; perniciose Terrarum exhalationes ; Aquæ corruptæ ; Cadavera insepulta ; Frumenta depravatæ qualitatibus , aut Lolio mixta ; Fames ; pravi Cibi ; Disciplinæ militaris inobservantia ; ipsamet Intemperantia , Vitæ militaris comes quandoque frequentior ; nimis varium Vitæ genus , Cœli tempestatibus obnoxium , sive dùm corpora Militum æstuosissimo Calore torrentur in Italiâ , sive dùm præmaturis Frigoribus , Brumis , Pluviis vexantur in Germaniâ. Nec inter Morborum militarium causas omittenda sunt Animi Pathemata ; quandoquidem victores Exercitus , quibus lætitiâ & alacritatem addit Victoria , se semper meliùs habeant , & minori ægrorum copiâ affligantur ; dùm è contra , immensum : quantâ ægrotantium multitudine perimantur Exercitus illi , qui vel numero Militum inferiores facti , vel aliâ quâcunque de causâ consternati , recessum moluntur.

Hæc omnia totidem sunt causæ , quæ plurimos accersunt Morbos , Febres intermittentes ; Febres verminosas ; Diarrhæas ; Pleuritides , Peripneumonias ; Febres ardentes , putridas , malignas , epidemicè grassantes , atque demùm Dysenterias , præsertim *colliquativas* , quæ crudelissimum Exercituum flagellum meritò dici possunt.

His si ægrotent Morbis Militiæ additi , quantas partes in eorum curatione agit Natura ! Non hic Culcitæ plumæ , non lanæ ; non hic Lecti mollibus stragulis aut tapetis compositi : non hic Cameræ accuratiùs clausæ : non Alimenta succulenta : non Medicamenta operosius præparata ; quinimò cuncta ad Locorum angustias , & Circumstan-

tiarum difficultates accommodata sunt. Atque, quod pejus est, omnia; jam ad Œconomiae leges redacta, heu nimium sapè! nefariè circumcidit undequaque, astantium omnis generis & assidentium Turba.

Milites nihilominus videbis, gravissimis decumbentes Morbis, paucis & exiguis auxiliis, prudenter administratis adjutos, quasi solo Naturæ ductu convalescere, vires resumere, & ad Militiam alacritè reverti.

Scilicet Naturæ vis non Morbos tantùm & Morborum causas profligat; sed ejus energiæ tantum adhuc superest, quantum par est ad removenda omnis generis impedimenta, quæ, sive à Locorum frigore & squallore, sive à perversâ Medicaminum administratione, sive ab assistentium incuriâ ac sorditie, sive ab ipsâmet intemperantiâ, Nosocomiorum militarium affectâ, sobolescent.

I I I.

AT verò jamjam instat Pugnæ indicta dies. Jam quisque sua ad aggrediendum aut ad repellendum apparat Arma. Jam Propugnacula Arcesve munitæ, vi adorienda sunt, vi pariter defendenda. Sed anceps est Victoria. Sapè à victore & victo, non minori redimitur quàm conceditur pretio. Nunquam incruentata procedit, victoribus ac victis plerumque pariter exitiosa.

Atque ut in iis recensendis immoremur, quorum ipsi testes adfui-
mus, sive dùm, MAILLEBOSIUS, feroces & bellicosos *CORSICÆ* Montium incolas, Armis domaret victricibus: sive dùm, Ducibus *HARCURIO*, *MAURITIO*, *BROGLIO*, *COGNIO*, jam famosa, *DANUBII RHENI*que Littora, secundo vicissim aut adverso Marte, novis illustrarentur Præliis: sive dùm, imperante *CONTIO BORBONIO*, Galli *MONTEM ALBANUM*, excelsaque *ALPIUM* tùm Maritimarum tùm Cottianarum cacumina, non Aceto ut *ANNIBAL*, sed Pectoribus ac vivâ vi perumperent; sive dùm, ad *CUNEUM* Prælio, *STURÆ* tristes *NYMPHÆ*, eundem *S. PRINCIPEM*, victorem agnoscerent: sive dùm, Duce *MAILLEBOSIO*, Galli cum Hispanis, *TANARO* Flumine superato, ad *AUGUSTAM BATTENORUM* cæderent *Pedemontios*: sive dùm iidem, sub *PLACENTIÆ* mœnibus, æquo Marte, cum *Ausfria* contendere; sive dùm, combinati Exercitus, strenuo non minùs quàm felici *MAILLEBOSII* Consilio, ipsomet stupente *ERIDANO*, triplici Ponte traducerentur, Hostesque deinde ad *TIDONEM* fortiter repellerent; sive dùm, impari Certamine, trans *MONTEM GENEVRUM*, Hostium muros impetuosius aggredierentur Galli; sive dùm Auspiciis *BELLILÆI* felicibus, ad avia *BALZIROSSI* Repagula, *Ausfria* simul & *Pedemontii*, per ardua Montium juga propullarentur; his omnibus in casibus, quàm plurimi,

5
gravissimis, Ferro aut Igne inflicto, prosternebantur Vulneribus, Victoriamve, non nisi confolis Corporibus & effuso Sanguine, redimebant.

Porro Vulnerum, quæ Bello accidunt, diversæ sunt species. Alia punctim, Ensisibus; alia cæsîm, majoribus & latis insiguntur Gladiis. Atque hæc & illa, vel Carnes tantummodò, vel Vasa sanguifera, Nervos, Tendines, Viscera, imò & Ossa, magis minùsve periculose, afficiunt. Est ubi *pyrius* Pulvis, ex Nitro, Sulphure, & Carbone, simul tritis & granulatim permixtis, conflatus, promptissimâ & admirabili deflagrandi ac fulgurandi facilitate, Igne quâvis de causâ accedente, detonat, vicina quæque potentiùs adurit, variasque Militum corporibus Combustiones imprimit. Est ubi eodem Pulvere *pyrio*, intra Fistulas metallicas compresso primùm, mox, ignis illabente Scintillulâ, vividius deflagrante; Globuli plumbei, ferrei, lapidei, & longinquo, magno cum strepitu emissi, per intimiora Præcordia adiguntur; Ossa perfrangunt; Vasa, Nervos, abripiunt & dilaniant, latius serpente Contusionis, enormisque lacerationis effectû. Est ubi Tormentis bellicis, multiplex tenuium Ferramentorum & Globulorum numerus, vel majores Globuli, sive simplices, sive bini catenatim colligati, sive etiam Igne candefacti & Ardentes, majore Pulveris *pyrii* copiâ, horrendo cum fragore exploduntur: atque, densas Peditum Equitumve Acies penetrando, quidquid obvium est abripiunt & prosternunt, Mortem & Vulnera longè latèque disseminant, Muros dejiciunt, accensisque Flammis omnia populantur. Est ubi, actis occultè sub Terram Cuniculis, cæcisque Concamerationibus Pulvere *pyrio* repletis, mox dato igne, integræ Militum Turmæ, superstantes, nec tale quid opinantes in Altum projiciuntur, aut apertis quasi Terræ Visceribus, absorbentur, magnâ cum omnium strage. Est ubi Globus major ferreus, Pulvere *pyrio* prægnans ipse, *pyrii* Pulveris impetu, ex æneo Mortario vibratur in Aëra sublimius, cum ignescente Caudâ; undè, capitibus imminens terribilis, præceps ruit, & immani pondere omnia pervadit ac diffringit: atque, mox à casu, intestinâ Detonatione dissilit in Flammas & Fragmenta, Lethum undique spargentia.

Talibus ingeniis in Hominum perniciem allaborant Homines, easque Corporibus insigunt Vulnera, quæ nullâ Arte reparari possent: nisi Natura *Medicatrix* succurreret efficaciter.

I V.

HAS quidem inter sive Ducum sive Militum, diversimodè fauciatorum, anxietates; Imperatoris, Supremi Exercitus Præfecti, Militaris rei Curatorum, Protomedici, Chirurgorum in id

conspirant Iussa, Ordines, Vota, ut iis, qui Vitam pro Patriâ generosè devoverunt, omnis generis auxilia subministrantur. Non impensis, non curis, non vigiliis parcitur. Sed ipsamet Vulneratorum multitudo, locorum Nosocomiis destinatarum angustia, fauciatos Milites transvehendi difficultas, Lectorum, Remediorum, Linteorum, rerumque necessariarum in tempore præcipiti penuria, varia à diversis circumstantiis impedimenta, efficiunt quandoque, ut, primis præsertim à Prælio diebus, ordinata & requisita non adedò præsto sint auxilia.

At non idcirco desperes. Habes in Naturæ penu, unde Vulnerum maxima pars quasi spontè refanetur. Vulneratorum nempe Militum vires, tum pugnandi labore, tum ipsismet Vulneribus exhaustæ, aliquo restaurante Alimento aut Medicamento si refocillantur, Vulnera, tenui Linamento ac leviori Fasciâ si devinciuntur, mirum quàm facile quàm celeriter eorum plurima coalescant. Id imprimis observavimus, in jam memorato ad *PLACENTIAM* Conflitu, in quo strenui tum Duces tum Milites, plusquàm duo millia vulnerati, Acinacibus Equitum levis armaturæ adedò graviter multabantur, ut pertinaciùs resistentes plurimi, ad duodecim, imò & viginti vulnera, in Capite, Facie, Collo, Pectore, Humeris, Brachiis, Manibus, & Digitis, acceperint. Attamen leviori curâ, & brevissimo tempore felicissimè convalescerunt.

Scilicet, in bene constitutis Militum corporibus, Vulnerum ora, seu vasa vasis accuratè commissa, Naturæ *Balsamo* atque Glutine consolidantur invicem. Aut si levior adsit Substantiæ jactura; ex Vulneris fundo ac marginibus, vi Vitæ naturali, surgit vasorum recrescentium congeries, quæ invicem concurrentia uniuntur, sicque perditam corporis substantiam reparant, mirabili Naturæ artificio. Vix enim quidquam Ars hic agit. Impedimenta tantùm removet; Aërem arcet, tegendo Vulnera; Ora Vulnerum Fasciis aut Suturis continet; Reliquum ac præcipuum Opus absolvit Natura.

Re quidem verâ, in fractis Ossibus, Chirurgia fractas partes invicem approximat; coadunatas retinet, artificiosâ Vinculorum, Fasciarum, Spleniorum, &c. applicatione. Sed hæc omnia, ut ut multa sint, quid profuerint? nisi majora adhuc operetur Natura: nempe Calli generationem, quæ interruptam Ossium stabilitatem restituit, quæ fractas & dissolutas partes ferruminat, efficitque ut incassum non allaboraverit Chirurgia. Mittimus Medicamenta osteocolla, quæ meræ sunt nugæ. Nullum est Gluten præstantius, quàm illud, quod ipsamet Natura generat, subministrat, applicat.

JAM verò si attendas ad ea Vulnera, quæ Sclopetis infliguntur, non minor est admirationi locus, nec minùs evidens Naturæ efficacitatis observatio. Hæc quippe Vulnera non aliam expostulant cûram, quàm ut contusa vasa Suppuratione decidant, & novæ postea succrescant Carnes. Sed in hoc Opere perficiendo, quodnam agens ipsâ Naturâ efficacius? Plumbi validiùs impacti motu ac celeritate, Vascula partis affectæ vehementer comprimuntur & dilacerantur; Nervi vellicantur ac convelluntur. Sed istius modi Vulnera nullâ venenatâ qualitate infecta sunt, nec combustionis aliquid retinent; verùm Contusis omninò debent annumerari. Scilicet Contusionis vis Combustionem simulat, atque ex Vasis laceris, contritis, & cum Sanguine permixtis, efficitur moles solidioris consistentiæ, Eschara dicta. Hæc temporis progressu, & vicinarum partium, Febrisve plerumque supervenientis, calore putrescit, corrumpitur, humescit, à Vasis integris separatur, tandemque decedit. Tunc hiantes integrorum Vasorum extremitates, contentos adhuc eructant succos, sub Puris formâ & nomine, donec sublato omni, qui extra *Circulationis* leges stagnabat, Sanguine, Granula carnea ex toto Vulneris ambitu succrescunt, quæ deperditam Fibrarum substantiam refarciunt, reparant, Vulnus replent, tandemque ad cutem, in Cicatricis formam, exsiccantur ac coeunt. Sed in hoc toto opere quid aliud animadvertitur, quàm ipsiusmet Naturæ opus? Si applicita Medicamenta juvant & promovent, præcipui tamen successus à Naturâ proficiuntur, cujus solius est Pus formare, & Carnes generare, & Cicatricem inducere. Nihil certè promovebunt remedia, si Natura repugnet, & nisi ipsa præcipuum *Operationis* negotium absolverit.

At verò certi sunt casus, in quibus ipsa Natura totum perficit opus. Adactò nempe intra Tarsi Carpive ossicula Globulo; hæc franguntur, disrumpuntur; circumpositæ suppurant partes; spongiosa eorum Ossium substantia purulentam imbibit materiem, quæ in corruptum Ichorem putrefacta, ipsamet Ossa Carie exedit. Attamen in robustioribus *Naturis*, & bene constitutis, & laudabili Humororum *Craşi* gaudentibus, talia perfectè sanari vulnera nos ipsi vidimus. Naturâ, scilicet, corruptum Ichorem, propriâ vi, emendante, Ossiculorum Squamulas foras protrudente, Carnes laudabiles generante, Cicatricem inducente.

Sed &, longè mirabiliora, possumus allegare Naturæ *Operationum*

exempla. Globulos *sclopetarios*, alios trans Penem & Scrotum: alios, ad Pubem immisos, Vesicam, totamque *Pelvis* cavitatem transgredientes, & ad posteriora exeuntes, nos ipsi vidimus. Vidimus & talia perfectè sanari Vulnera. Quin etiam Glandes plumbeas, trans Pectoris cavitatem, ipsosque Pulmones, ex anteriori parte, in posteriorem lateris oppositi partem adactas, & perfectè postea binos, hunc in modum Vulneratos, convaluisse observavimus. Quorum quidem Vulnerum curationem, Arti quàm minimùm, Naturæ quàm plurimùm, deberi fatendum est.

Ergo, etiam in Chirurgicis, Naturæ Medicatricis efficaciam agnoscit Medicina Militaris.

DOMINI DOCTORES DISPUTATURI.

M. Leander Peaget, Consiliarius Medicus Regis ordinarius in ejus Castellato.

M. Josephus-Exuperius Bertin, Supremi Walachia & Moldaviae Principis Medicus ordinarius, & Regiae Scientiarum Academiae Socius Veteranius.

M. David Vasse.

M. Ludovicus-Alexander Vicillard.

M. Carolus Dionis.

M. Andreas-Josephus Seron.

M. Ludovicus-Guillelmus le Monnier, Consiliarius Medicus Regis ordinarius Regique Nosocomii San-Germani in Layâ, Regiarumque Franciæ, Londinensium ac Berolinensium Academicarum Socius.

M. Gedcon de Rabours.

M. Thomas-Renatus Gafuier.

Proponebat Parisiis, MARTINUS NOUGUEZ, Adurensis, à Comitatu Armeniaco, Saluberrimæ Facultatis Medicinæ Parisiensis Baccalaureus, A. R. S. H. 1750, à sextâ ad meridiem.